

MESYUARAT KEDUA, PENGGAL KEEMPAT
PARLIMEN KEEMPAT BELAS
2021

HARI ISNIN : 25 OKTOBER 2021

KANDUNGAN

JAWAPAN-JAWAPAN BAGI PERTANYAAN-PERTANYAAN JAWAB

LISAN YANG TIDAK DIJAWAB DI DALAM DEWAN

(SOALAN NO. 4, 11 HINGGA NO. 40)

**[SOALAN NO 4 DIJAWAB BERSEKALI DENGAN
SOALAN NO 21]**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN LIM GUAN ENG [BAGAN]

TARIKH : 25 OKTOBER 2021 (ISNIN)

SOALAN

TUAN LIM GUAN ENG [BAGAN] minta **MENTERI LUAR NEGERI** menyatakan pendirian Malaysia terhadap Afghanistan selepas dikuasai semula oleh Taliban dan sama ada hubungan diplomatik tertakluk kepada syarat hak asasi wanita tidak dicabuli di Afghanistan, khususnya dalam peluang pendidikan dan pekerjaan serta penglibatan dalam pentadbiran.

PERTANYAAN : JAWAB LISAN

**DARIPADA : DATUK SERI DR. MUJAHID BIN YUSOF
RAWA [PARIT BUNTAR]**

TARIKH : 25 OKTOBER 2021 (ISNIN)

SOALAN

DATUK SERI DR. MUJAHID BIN YUSOF RAWA [PARIT BUNTAR] minta **MENTERI LUAR NEGERI** menyatakan sikap hubungan dengan Kerajaan baharu Afghanistan yang dikuasai oleh Taliban.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN HAJI MOHAMAD BIN SABU [KOTA RAJA]

TARIKH : 1 DISEMBER 2021 (RABU)

SOALAN

TUAN HAJI MOHAMAD BIN SABU [KOTA RAJA] minta **MENTERI LUAR NEGERI** menyatakan apakah usaha Malaysia bersama OIC yang lain untuk membina dan membangun semula negara Afghanistan.

PERTANYAAN : JAWAB LISAN

DARIPADA : TUAN WONG CHEN [SUBANG]

TARIKH : 13 DISEMBER 2021 (ISNIN)

SOALAN

TUAN WONG CHEN [SUBANG] minta **MENTERI LUAR NEGERI** menyatakan adakah Kerajaan Malaysia akan mengiktiraf kerajaan Taliban di Afghanistan sedangkan Taliban mempunyai rekod hak asasi manusia yang buruk dan mendiskriminasi wanita secara terbuka.

JAWAPAN

Tuan Yang di-Pertua,

Saya mengucapkan terima kasih kepada **Yang Berhormat Bagan** atas pertanyaan yang dikemukakan.

2. Izinkan saya menjawab pertanyaan Yang Berhormat Bagan bersekali dengan pertanyaan-pertanyaan yang dikemukakan oleh **Yang Berhormat Parit Buntar, Yang Berhormat Kota Raja** dan **Yang Berhormat Subang** masing-masing bertarikh 25 Oktober, 1 Disember dan 13 Disember 2021 kerana pertanyaan-pertanyaan tersebut menyentuh isu yang sama.

3. Secara keseluruhannya, ada tiga isu utama yang dibangkitkan oleh Ahli-ahli Yang Berhormat iaitu:

- i. Pertama, berkaitan pandangan dan pendirian Malaysia terhadap Afghanistan yang dikuasai oleh Taliban ;
- ii. Kedua, peranan Malaysia menerusi Pertubuhan Kerjasama Islam (OIC) untuk membina dan membangun semula Afghanistan; dan
- iii. Ketiga, isu pengiktirafan ke atas kerajaan Afghanistan.

PANDANGAN DAN PENDIRIAN MALAYSIA TERHADAP AFGHANISTAN YANG DIKUASAI TALIBAN

Tuan Yang di-Pertua,

4. Malaysia berpendirian bahawa sebarang perubahan politik dalaman Afghanistan perlu berpaksikan kepada kepentingan para pemegang taruh serta aspirasi rakyatnya sendiri, iaitu, berdasarkan pendekatan, dengan izin, *Afghan-led, Afghan-owned and Afghan-controlled peace and national reconciliation process*. Di sini terdapat keperluan dan kepentingan untuk menyelesaikan situasi di Afghanistan dengan cara perundingan dan muafakat inklusif yang melibatkan penyertaan semua lapisan masyarakat di negara tersebut dengan matlamat penubuhan sebuah kerajaan Afghanistan yang menyeluruh.

PERANAN MALAYSIA MENERUSI PERTUBUHAN KERJASAMA ISLAM (OIC) BERHUBUNG SITUASI DI AFGHANISTAN

5. Semasa Mesyuarat Tergempar Jawatankuasa Eksekutif OIC pada 22 Ogos 2021 di Jeddah, yang turut disertai Malaysia, OIC telah menetapkan pendirian-pendirian berikut:

- i. Pertama, mengukuhkan komitmen dan sokongan OIC terhadap Afghanistan seperti yang dinyatakan dalam resolusi-resolusi yang diterima pakai pada Sidang Kemuncak OIC dan Mesyuarat Menteri-Menteri Luar OIC;
- ii. Kedua, mengetengahkan harapan masyarakat antarabangsa dari kepimpinan baru di Afghanistan untuk mempromosikan perdamaian nasional dan mematuhi undang-undang antarabangsa dan resolusi serta Piagam Pertubuhan Bangsa-Bangsa Bersatu (PBB); dan
- iii. Ketiga, menggariskan kepentingan untuk melindungi dan menghormati hak kehidupan, keselamatan dan maruah rakyat Afghanistan dalam mematuhi Deklarasi Sejagat Hak Asasi Manusia (*Universal Declaration on Human Rights* - UDHR).

6. Secara keseluruhannya, negara-negara anggota OIC bersetuju untuk memberi sokongan penuh terhadap penyelesaian di Afghanistan dalam mencapai perdamaian secara komprehensif dan berkekalan. OIC pada ketika ini sedang memberi tumpuan kepada penyaluran bantuan kemanusiaan kepada rakyat Afghanistan. YB Menteri Luar Negeri telah juga mengadakan perbincangan mengenai Afghanistan dengan rakan sejawat beliau dari Arab Saudi, Indonesia dan Qatar serta Setiausaha Agung OIC.

ISU PENGIKTIRAFAN KERAJAAN SEMENTARA EMIRIAH ISLAM AFGHANISTAN

Tuan Yang di-Pertua,

7. Pendirian Malaysia adalah selari dengan seluruh komuniti antarabangsa iaitu memberi keutamaan kepada bantuan kemanusiaan dan pembangunan semula Afghanistan. Untuk tujuan ini, Malaysia juga seperti negara-negara lain berpandangan bahawa keterlibatan secara membina (*constructive engagement*) perlu dilakukan dengan pihak yang berkuasa di Afghanistan. Manakala, sebagaimana amalan biasa dalam isu pengiktirafan sesebuah negara, terdapat faktor-faktor atau parameter tertentu yang perlu diambil kira atau dipertimbangkan.

8. Antara faktor-faktor tersebut adalah seperti isu keabsahan atau dengan izin '*legitimacy*' yang merujuk kepada tahap penerimaan rakyat negara berkenaan terhadap penguasaan dan penubuhan kerajaan di negara tersebut. Seterusnya, kerajaan yang dibentuk hendaklah bersifat inklusif yang merangkumi penyertaan pelbagai golongan termasuk etnik-etnik minoriti, serta penyertaan wanita dalam pemerintahan bagi tujuan mencapai keamanan dan kestabilan berkekalan. Penyertaan wanita dalam pentadbiran adalah penting bukan sahaja daripada sudut memelihara hak-hak wanita dan anak-anak perempuan (*women and girls*, dengan izin) tetapi juga daripada aspek peranan dan sumbangan mereka kepada pembinaan sesebuah masyarakat dan negara (*nation building*).

9. Dalam konteks Afghanistan, ia perlu berpaksikan kepada para pemegang taruh serta rakyatnya sendiri.

Tuan Yang di-Pertua,

10. Dalam hal ini, Malaysia akan terus memantau perkembangan di Afghanistan. Pada masa yang sama, Kementerian Luar Negeri juga bersedia menjadi pemudah cara kepada pertubuhan bukan kerajaan (NGO) Malaysia dalam usaha untuk menghulurkan bantuan-bantuan kemanusiaan kepada rakyat Afghanistan yang memerlukan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN CHE ALIAS BIN HAMID
[KEMAMAN]**

TARIKH : 25 OKTOBER 2021 (ISNIN)

SOALAN :

Minta **PERDANA MENTERI** menyatakan langkah Kerajaan untuk membantu pusat-pusat tahfiz yang tidak beroperasi ekoran masalah kewangan dan dana dalam tempoh pelaksanaan PKP 3.0.

JAWAPAN

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Pandemik Covid-19 yang melanda dunia hari ini telah memberi impak yang besar kepada semua sektor termasuk sektor pendidikan. Justeru, Kerajaan telah memperkenalkan pelbagai inisiatif bagi membantu kelangsungan pengoperasian institusi pendidikan di negara ini termasuk institusi tahfiz swasta yang berdaftar dengan Pihak Berkuasa Agama Negeri. Antaranya dengan memperkenalkan Pengajaran dan Pembelajaran di Rumah (PdPR) bagi membolehkan institusi berkenaan terus dapat beroperasi dalam norma baharu. Sebelum itu, ingin saya jelaskan di dewan yang mulia ini bahawa berdasarkan maklumat yang

disahkan oleh Pihak Berkuasa Agama Negeri, hakikatnya penutupan institusi tahfiz swasta berdaftar adalah hanya bersifat sementara bagi mematuhi arahan Kerajaan supaya rantai jangkitan wabak Covid-19 dapat diputuskan. Namun begitu, tidak dinafikan terdapat institusi yang tidak berdaftar yang berhadapan dengan kemerosotan sumber kewangan impak pandemik ini.

2. Pada tahun 2021, Kerajaan sekali lagi menyediakan peruntukan sebanyak RM100,000,000.00 secara *one-off* bagi tujuan selenggara dan naik taraf Institusi Pendidikan Islam di bawah penyelarasan Lembaga Penasihat Penyelarasan Pelajaran dan Pendidikan Agama Islam (LEPAI) merangkumi Sekolah Agama, institusi tahfiz dan pondok. Sehingga Ogos 2021, sebanyak RM60,000,000.00 telah disalurkan kepada 1,066 buah institusi yang layak dan daripada jumlah tersebut sebanyak RM22,257,100.00 telah disalurkan kepada 413 buah institusi tahfiz di negeri-negeri seluruh negara. Kerajaan amat prihatin untuk membantu pengurusan dan pengoperasian institusi tahfiz yang terjejas. Untuk tujuan tersebut, kerajaan telah bersetuju untuk mengagihkan sebahagian daripada baki RM40,000,000.00 yang telah diterima oleh JAKIM pada 4 Oktober 2021.

3. Bagi bantuan jangka panjang, Kerajaan turut merancang untuk memberi kemahiran Tahfiz TVET kepada pengusaha dan murid tahfiz bagi membolehkan mereka menjana pendapatan sendiri dan tidak terlalu bergantung kepada bantuan dan sumbangan kerajaan serta masyarakat, dalam memastikan institusi tahfiz di bawah kelolaan mereka terus dapat beroperasi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KEEMPAT,
PARLIMEN KEEMPAT BELAS (2021)**

PERTANYAAN : LISAN

**DARIPADA : TUAN PRABAKARAN A/L M
PARAMESWARAN [BATU]**

TARIKH : 25 OKTOBER 2021 (ISNIN)

SOALAN

Tuan Prabakaran A/L M Parameswaran [Batu] minta **MENTERI WILAYAH PERSEKUTUAN** menyatakan apakah tindakan yang telah diambil untuk mengatasi masalah yang dialami penduduk perumahan Sri Aman, Jinjang. Pembeli rumah di sana dibelenggu isu kebocoran dari merata tempat di dalam dan di luar rumah mereka. Masalah ini berlarutan semenjak mereka pindah masuk pada tahun 2017.

JAWAPAN

Tuan Yang di-Pertua,

Untuk makluman Ahli Yang Berhormat Batu, PPR Seri Aman ini telah diserahkan oleh pihak KPKT kepada pihak DBKL pada tahun 2017 dan ia merangkumi empat (4) blok melibatkan 1,600 unit.

Isu kebocoran yang berlaku adalah disebabkan oleh kegagalan sistem kalis air unit serta masalah paip bocor menyebabkan resapan berlaku di luar dan juga di dalam unit-unit pembeli/ penyewa di kawasan tersebut.

Lawatan tapak oleh Datuk Bandar dan Pengurusan Tertinggi Dewan Bandaraya Kuala Lumpur (DBKL) juga telah diadakan pada 11 September 2021.

Bagi menyelesaikan masalah ini dari berulang, pihak DBKL telah mengambil beberapa pendekatan termasuk mengubahsuai jajaran paip dalam unit serta sistem kalis air terhadap unit-unit yang terlibat.

Namun begitu, isu kerosakan berulang ini telah menyebabkan kos baik pulih yang tinggi di PPR berkenaan dan DBKL akan komited untuk membaik pulih kerosakan-kerosakan tersebut dan dalam masa yang sama DBKL turut merujuk perkara ini kepada Kementerian Perumahan dan Kerajaan Tempatan (KPKT).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : DATO' HAJI AHMAD NAZLAN BIN IDRIS
[JERANTUT]**

TARIKH : 25 OKTOBER 2021 (ISNIN)

SOALAN

DATO' HAJI AHMAD NAZLAN BIN IDRIS [JERANTUT] minta **PERDANA MENTERI** menyatakan sejauh mana Perintah Tahan Pelepasan (WRO) yang dikeluarkan oleh Jabatan Kastam dan Perlindungan Sempadan (CBP) Amerika Syarikat ke atas FGV Holdings Berhad memberi kesan kepada peneroka FELDA dan apakah usaha Kerajaan untuk menyelesaikan isu ini.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Perintah Tahan Pelepasan (WRO) yang dikeluarkan oleh Jabatan Kastam dan Perlindungan Sempadan (CBP) Amerika Syarikat ke atas FGV Holdings Berhad (FGV) telah menyebabkan produk sawit yang dikeluarkan oleh FGV dan anak syarikat serta syarikat usahasama FGV tidak dapat dieksport ke Amerika Syarikat. Namun demikian, larangan eksport tersebut tidak memberi implikasi besar kepada FGV dan peneroka FELDA kerana jumlah eksport minyak dan produk sawit ke Amerika Syarikat adalah kecil iaitu kurang 0.1% daripada jumlah eksport FGV.
2. Walau bagaimanapun, Kerajaan dan FELDA memandang serius isu pengeluaran WRO oleh CBP yang memberi kesan negatif terhadap reputasi FGV dan boleh menyebabkan kesan susulan (*ripple effect*) yang menjejaskan kebolehpasaran produk FGV di luar pasaran Amerika Syarikat. Pengeluaran WRO ini juga dikhuatiri akan menyebabkan negara lain turut mengambil tindakan serupa dengan mengadakan siasatan ke atas FGV yang seterusnya mampu mendedahkan FGV kepada risiko sekatan pasaran penjualan minyak dan produk sawit FGV. Sekiranya perkara ini berlaku, ianya akan memberi kesan kepada peneroka FELDA apabila FGV terpaksa mengurangkan pembelian buah sawit daripada peneroka FELDA disebabkan sekatan kebolehpasaran produk sawit FGV.
3. Bagi menangani perkara ini, FGV sedang mengambil langkah-langkah penambahbaikan yang telah disyorkan oleh CBP termasuk melantik juruaudit bebas bagi menjalankan penilaian operasi FGV terhadap 11 petunjuk Pertubuhan Buruh Antarabangsa (ILO) berkaitan buruh paksa, seperti yang dinasihati oleh CBP.

4. FGV kini sedang mengemukakan tawaran kepada juruaudit berpotensi dan menjangka akan memuktamadkan pelantikan pada November 2021. Penilaian ini bagi menentukan sama ada terdapat amalan penggunaan buruh paksa mengikut definisi Pertubuhan Buruh Antarabangsa atau ILO. Penilaian ini dibuat dalam keseluruhan rantai bekalan buah tandan segar (BTS) termasuk daripada tanah rancangan FELDA. Proses penilaian dijangka akan mengambil tempoh 5 hingga 8 bulan dan selepas laporan penilaian dan tindakan pembetulan dilaksanakan, FGV dan juruaudit akan mengemukakan laporan kepada CBP untuk pertimbangan penarikan balik WRO yang dikeluarkan.

5. Pada masa yang sama, FGV sedang giat melaksanakan pelbagai usaha dan inisiatif bagi menambah baik amalan perburuhan di ladang-ladang kelapa sawit FGV. Ini termasuk program kerjasama bersama *Fair Labor Association* (FLA) yang merangkumi pelbagai aspek amalan buruh antaranya penambahbaikan proses pengambilan pekerja asing, pengukuhan program latihan hak asasi manusia untuk pekerja-pekerja ladang, pengukuhan mekanisme aduan serta pemantapan sistem pemantauan kepatuhan terhadap piawaian perburuhan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

DARIPADA : DATO' NGEH KOO HAM [BERUAS]

TARIKH : 25 OKTOBER 2021 (ISNIN)

SOALAN

DATO' NGEH KOO HAM [BERUAS] minta **PERDANA MENTERI** menyatakan kenapa Perdana Menteri mesti diberikan kuasa mutlak ke atas Petroleum National Bhd (Petronas) di bawah Akta Petroleum 1974 dan sama ada Kerajaan bercadang membuat pindaan kepada akta tersebut supaya kuasa ini diberikan kepada satu badan Lembaga Pengarah yang bertanggungjawab kepada Kabinet.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. PETRONAS merupakan syarikat milik penuh Kerajaan Malaysia yang bertanggungjawab dalam pembangunan sektor minyak dan gas negara. Walaupun Akta Pembangunan Petroleum 1974 (PDA1974) menyatakan PETRONAS adalah di bawah kuasa mutlak Perdana Menteri, PETRONAS ialah syarikat yang ditubuhkan di bawah Akta Syarikat 1965. Pada masa ini, pendirian Kerajaan Persekutuan adalah jelas untuk tidak meminda Akta Pembangunan Petroleum 1974.
2. Sebagai entiti komersial berasaskan keuntungan, PETRONAS mengamalkan aspek tadbir urus korporat yang baik (*good corporate governance*) dan ketelusan menerusi barisan kepimpinan eksekutif kanan yang diterajui oleh Presiden dan Ketua Pegawai Eksekutif. Segala keputusan syarikat juga akan dibincang dan diteliti oleh barisan lembaga pengarah dan Pengerusi PETRONAS yang terdiri daripada ahli teknokrat dan pegawai kanan kerajaan yang berpengalaman luas dalam bidang kepakaran masing-masing.
3. Dalam usaha meningkatkan ketelusan, PETRONAS selama ini telah mengambil inisiatif untuk melaporkan laporan prestasi kewangan dan operasi serta maklumat-maklumat korporat yang lain pada setiap suku tahun dan tahunan menerusi laman sesawang www.petronas.com yang boleh diakses oleh semua pihak termasuk orang awam meskipun PETRONAS bukan syarikat yang disenaraikan di bursa saham.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SYED ABU HUSSIN BIN HAFIZ
SYED ABDUL FASAL
[BUKIT GANTANG]**

TARIKH : 25 OKTOBER 2021 (ISNIN)

SOALAN :

Minta **PERDANA MENTERI** menyatakan komitmen Kerajaan terhadap pembangunan Sekolah Rendah Agama Rakyat (SRAR) yang agak ketinggalan dari segi kemudahan dan infrastruktur dan berapakah peruntukan yang telah disasarkan untuk memastikan suasana kondusif dapat diberikan setara kepada keperluan pengajian asas fardu ain KAFA ini kepada anak-anak di seluruh negara termasuk 30 buah SRAR di Parlimen Bukit Gantang.

JAWAPAN

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Sebagaimana Ahli Yang Berhormat sedia maklum, Kerajaan dari semasa ke semasa berusaha untuk memperkasakan Sekolah Agama Rakyat (SAR) di Malaysia. Sejak tahun 2019 hingga 2021, Kerajaan telah memperuntukkan sebanyak RM300 juta bagi memperkasa Institusi Pendidikan Islam di bawah penyelarasan Lembaga Penasihat Penyelarasan Pelajaran dan Pendidikan Agama Islam (LEPAI) yang berdaftar dengan Pihak Berkuasa Agama Negeri. Ia merangkumi Sekolah Agama Negeri (SAN), Sekolah Agama Rakyat (SAR), Sekolah Agama Swasta (SAS), institusi tahfiz dan pondok. Bantuan ini bagi tujuan selenggara dan naik taraf infrastruktur institusi pendidikan Islam berkenaan yang keseluruhannya telah memberi manfaat kepada 3,654 buah institusi. Daripada jumlah tersebut, sebanyak RM85,675,780.00 juta telah disalurkan bagi membantu 1,557 buah Sekolah Agama (Negeri, Rakyat dan Swasta) di seluruh negara yang memberi manfaat kepada 2,066,163 orang murid.

Sekian,

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN KARUPAIYA A/L MUTUSAMI

TARIKH : 25 OKTOBER 2021

SOALAN

Tuan Karupaiya A/L Mutusami [Padang Serai] minta **PERDANA MENTERI** menyatakan mengenai isu pengambilan rakyat kaum India dalam sektor Kerajaan. Boleh nyatakan peratusan rakyat kaum India yang bekerja dalam sektor Kerajaan berbanding kaum lain tanpa mengira guru sekolah Tamil.

JAWAPAN:

DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS TUGAS KHAS)

1. Kaedah pengambilan dan pelantikan pegawai ke Perkhidmatan Awam Am Persekutuan dan empat (4) negeri iaitu Melaka, Pulau Pinang, Negeri Sembilan dan Perlis yang dilaksanakan melalui SPA adalah berasaskan merit dan kompetensi seseorang calon. Dasar pelantikan ini bertujuan untuk memastikan calon yang berkualiti sahaja dilantik ke Perkhidmatan Awam. Tiada penetapan sebarang kuota untuk sesuatu agama, kaum atau etnik tertentu dalam pelantikan anggota perkhidmatan awam. Semua warganegara Malaysia mempunyai peluang yang sama untuk dipertimbangkan dalam persaingan yang terbuka dan adil (*open and fair competition*).
2. Bagi urusan pengambilan yang melibatkan calon kaum India untuk tempoh 2016 hingga 2020, SPA telah menerima permohonan seramai 228,981 orang calon kaum India, iaitu 3.1% daripada jumlah permohonan keseluruhan yang berjumlah 7,440,756 orang. Jumlah calon kaum India yang berjaya dilantik pula adalah seramai 2,224 orang, iaitu 2.6% daripada jumlah pelantikan keseluruhan yang berjumlah 86,128 orang.

Tahun	Permohonan Keseluruhan	Permohonan Kaum India	Peratusan Permohonan Kaum India	Pelantikan Keseluruhan	Pelantikan Kaum India	Peratusan Pelantikan Kaum India
2016	1,561,206	50,369	3.2%	25,046	958	3.8%
2017	1,342,949	41,556	3.1%	15,090	254	1.7%
2018	1,347,544	42,641	3.2%	13,454	242	1.8%
2019	1,485,161	46,579	3.1%	17,020	375	2.2%
2020	1,703,896	47,836	2.8%	15,518	395	2.5%
JUMLAH	7,440,756	228,981	3.1%	86,128	2,224	2.6%

3. Antara isu yang sering dihadapi dalam urusan pengambilan (termasuk pengambilan calon kaum India) adalah:

- (i) calon tidak menepati syarat tapisan minimum syarat skim perkhidmatan bagi permohonan jawatan gred 11 dan 19;
 - (ii) calon tidak memiliki kelayakan akademik/bidang keutamaan yang ditetapkan oleh Ketua Perkhidmatan bagi permohonan jawatan gred 29 dan 41;
 - (iii) calon tidak berjaya dalam Peperiksaan Memasuki Perkhidmatan Awam (PSEE); dan
 - (iv) calon tidak berjaya dalam temu duga.
4. Berdasarkan maklumat dari Sistem Maklumat Pengurusan Sumber Manusia (HRMIS), jumlah pegawai awam Persekutuan daripada kaum India yang sedang berkhidmat ketika ini adalah seramai 41,168 orang, iaitu 4.15% daripada jumlah keseluruhan penjawat awam di Malaysia, tanpa mengambil kira mereka yang berkhidmat di dalam Polis Diraja Malaysia (PDRM) dan Angkatan Tentera Diraja Malaysia (ATM). Daripada jumlah pegawai awam Persekutuan kaum India, seramai 8,050 orang sedang berkhidmat di Sekolah-Sekolah Tamil di bawah Kementerian Pendidikan Malaysia.

Kaum	Bilangan
Melayu	754,040 (75.95%)
Cina	68,542 (6.90%)
India	41,168 (4.15%)
Bumiputera Sabah	73,265 (7.38%)
Bumiputera Sarawak	47,116 (4.75%)
Lain-lain kaum	8,634 (0.87%)
JUMLAH	992,765

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA PENGGAL KEEMPAT
PARLIMEN KEEMPAT BELAS 2021**

PERTANYAAN : JAWAB LISAN

**DARIPADA : YB DATUK SERI MOHD REDZUAN BIN
MD YUSOF
[ALOR STAR]**

TARIKH : 25 OKTOBER 2021 (ISNIN)

SOALAN:

Minta **PERDANA MENTERI** menyatakan adakah Kerajaan sedang menyemak dan bercadang untuk memberi pendapatan tetap atau menaikkan elaun tetap Imam-imam Qariah Masjid yang berkhidmat sepenuh masa bagi membawa keluar golongan ini daripada Pendapatan Garis Kemiskinan (PGK) sebagai cara melestarikan agenda Wawasan Kemakmuran Bersama 2030

JAWAPAN

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI
(HAL EHWAL AGAMA)**

Tuan Yang Di Pertua,

1. Untuk makluman Ahli Yang Berhormat, pengurusan imam-imam masjid kariah adalah di bawah bidang kuasa negeri. Pada masa ini tiada pendapatan (gaji) tetap diberikan oleh negeri kepada imam-imam masjid kariah. Walau bagaimanapun, Kerajaan Persekutuan melalui JAKIM telah bersetuju menyalurkan peruntukan bagi membayar imbuhan bulanan kepada imam-imam masjid kariah / mukim di seluruh negara bermula pada Januari 2005 dengan kadar imbuhan bulanan pada ketika itu sebanyak RM450.00. Pada tahun 2005, Kerajaan Persekutuan telah membelanjakan sebanyak RM49,817,500.00 untuk bayaran kepada 9,666 orang imam di seluruh negara.
2. Kerajaan juga telah bersetuju untuk menaikkan kadar imbuhan bulanan imam-imam masjid kariah sebanyak tiga kali bermula pada tahun 2005 sehingga kini seperti berikut:
 - i. 2005 : RM450 .00 sebulan
 - ii. 2011: RM750.00 sebulan
 - iii. 2017 : RM850.00 sebulan sehingga kini
3. Bagi tahun 2019 sehingga 2021, Jabatan Kemajuan Islam Malaysia (JAKIM) telah menyalurkan peruntukan sebanyak RM RM438,600,000.00 ke negeri-negeri bagi pembayaran imbuhan bulanan kepada 14,373 orang imam masjid kariah di seluruh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 25 OKTOBER 2021

SOALAN

Tuan Pang Hok Liong [Labis] minta **PERDANA MENTERI** menyatakan dengan terperinci projek-projek yang telah dilaksanakan dan peratusannya di bawah setiap Rancangan Malaysia dari Rancangan Malaysia Ke-6 hingga Rancangan Malaysia Ke-11 dan senaraikan projek-projek yang belum atau tidak dapat dilaksanakan dan sebab utamanya.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Kerajaan sentiasa memberi perhatian dan prihatin kepada keperluan dan kemakmuran rakyat di seluruh negara. Kerajaan juga sentiasa berusaha untuk memastikan kesejahteraan rakyat terus menjadi keutamaan bagi memelihara dan meningkatkan taraf hidup rakyat.

2. Untuk makluman Ahli Yang Berhormat, jumlah peruntukan pembangunan yang telah diluluskan oleh Kerajaan Persekutuan bagi enam Rancangan Malaysia, iaitu mulai tahun 1991 hingga 2020 adalah sebanyak RM915.0 bilion. Sepertimana yang telah dinyatakan, perincian peruntukan asal mulai daripada Rancangan Malaysia Keenam sehingga Rancangan Malaysia Kesebelas adalah seperti berikut:

Bil.	RMK	Tahun	Peruntukan (RM Juta)
1	Keenam	1991 - 1995	55,000
2	Ketujuh	1996 - 2000	67,500
3	Kelapan	2000 - 2005	110,000
4	Kesembilan	2006 - 2010	200,000
5	Kesepuluh	2011 - 2015	233,824
6	Kesebelas	2016 - 2020	248,700
	JUMLAH		915,024

3. Untuk makluman Ahli Yang Berhormat, tempoh pelaksanaan sesuatu projek yang telah diluluskan tidak dihadkan dalam tempoh satu Rancangan Malaysia Lima Tahun (RMLT). Tempoh pelaksanaan projek adalah berkait rapat dengan prestasi kemajuan projek dan kemampuan kontraktor yang dilantik. Sekiranya projek tersebut tidak dapat disiapkan dalam tempoh 5 tahun, pelaksanaannya akan diteruskan dalam RMLT berikutnya sebagai projek sambungan.

4. Kerajaan sentiasa memantau pelaksanaan projek yang diluluskan bagi memastikan ianya sentiasa mengikut jadual dan dapat disiapkan sebagaimana dirancang. Pada masa ini, terdapat pelbagai platform/taskforce diwujudkan di peringkat kementerian/negeri bagi membincangkan isu-isu pelaksanaan dan mencadangkan langkah-langkah penambahbaikan untuk menangani projek sakit/ lewat jadual. Contoh platform yang diwujudkan adalah Majlis Tindakan Pembangunan Kementerian (MTPK) dan Mesyuarat Tindakan Pembangunan Negeri (MTPNg), malah saya bersama-sama Ketua Setiausaha Negara mempengerusikan Jawatankuasa Pemudahcara dan Pemantauan Pelaksanaan Projek.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 25 OKTOBER 2021 (ISNIN)

SOALAN

DATUK IGNATIUS DARELL LEIKING [PENAMPANG] minta **MENTERI KANAN PERDAGANGAN ANTARABANGSA DAN INDUSTRI** menyatakan adakah Kerajaan membuat kajian mengenai prestasi perniagaan pelabur asing untuk 2021. Jika prestasi perniagaan pelabur asing adalah tidak memuaskan, apakah langkah yang akan diambil oleh Kerajaan untuk meningkatkan tahap keyakinan pelabur asing.

JAWAPAN

Tuan Yang di-Pertua,

Malaysia tidak menjalankan kajian mengenai prestasi perniagaan pelabur asing untuk 2021 secara spesifik namun telah menyasarkan untuk menarik pelaburan yang terpilih dan berfokus untuk memastikan pelaburan asing yang masuk ke dalam negara adalah pelaburan yang berkualiti dan berimpak tinggi.

Kerajaan sedar akan keperluan dan kepentingan untuk membangunkan sektor-sektor industri yang berteraskan teknologi tinggi dan mempunyai nilai tambah terhadap ekosistem industri di negara ini dan tidak lagi menerima pelaburan yang mempunyai elemen *low end assembly-type operations and labour-intensive projects*.

Antara usaha-usaha lain Kerajaan untuk meningkatkan tahap keyakinan pelabur asing adalah seperti berikut:

- i. Pengenalan insentif bagi menggalakkan FDI di bawah PENJANA melalui pakej pengecualian cukai istimewa untuk menggalakkan syarikat asing memindahkan (*re/locate*) operasinya ke Malaysia atau menjalankan pelaburan baharu dalam sektor perkilangan dan perkhidmatan dan menjadikan Malaysia sebagai pusat rangkaian bekalan antarabangsa;
- ii. Insentif bagi pengeluar produk farmaseutikal termasuk vaksin di bawah Belanjawan 2021 melalui pakej pengecualian cukai istimewa yang diumumkan oleh Kerajaan pada 6 November 2020 dengan objektif utamanya adalah untuk menarik pelaburan daripada sektor farmaseutikal termasuk syarikat-syarikat pembuatan vaksin;
- iii. Fasilitasi dalam mendapatkan kelulusan dan mempercepatkan pelaksanaan projek seperti berikut;

- a. Kelulusan Lesen Pengilangan (*Manufacturing Liscence – ML*) *fast track* melalui platform digital e-ML untuk industri yang tidak sensitif dalam tempoh dua hari bekerja;
- b. Inisiatif Unit Percepatan dan Koordinasi Projek (*Project Acceleration and Coordination Unit – PACU* di MIDA) dilancarkan pada tahun 2020 untuk membantu secara keseluruhan (*end-to-end facilitation*) semua projek yang diluluskan bagi memastikan projek pelaburan dapat dilaksanakan dalam tempoh masa yang ditetapkan;
- c. Memperkenalkan Portal *InvestMalaysia* iaitu platform permohonan dalam talian kendalian MIDA bagi membantu pelabur secara maya; dan
- d. Penubuhan Pusat Sehenti (*One Stop Centre – OSC*) kepada Pelawat Perniagaan di MIDA bagi menilai permohonan yang layak untuk memasuki Malaysia bagi tujuan perdagangan dan pelaburan.

Malaysia telah berjaya untuk menarik pelaburan baharu yang berkualiti bagi tahun 2021 walaupun masih berdepan dengan cabaran akibat pandemik COVID-19. Bagi tempoh Januari 2021 sehingga Jun 2021, jumlah pelaburan yang diluluskan dalam ekonomi merangkumi sektor perkilangan, perkhidmatan dan utama telah meningkat sebanyak 69.8% berjumlah RM107.5 bilion daripada tempoh yang sama tahun lalu (RM63.3 bilion). Sektor perkilangan adalah penyumbang terbesar kepada nilai pelaburan yang diluluskan iaitu sebanyak RM66.9 bilion, diikuti sektor perkhidmatan dengan pelaburan sebanyak RM34.1 bilion dan sektor utama dengan pelaburan berjumlah RM6.5 bilion. Pelaburan yang diluluskan dalam tempoh tersebut membabitkan sebanyak 2,110 projek dan dijangka akan mewujudkan 44,994 peluang pekerjaan baharu.

Daripada jumlah pelaburan yang diluluskan, pelaburan langsung asing (*foreign direct investment – FDI*) menyumbang sebanyak RM62.5 bilion iaitu lonjakan sebanyak 214.9% berbanding dengan tempoh yang sama tahun lalu, dan lonjakan FDI adalah lebih tinggi dalam sektor perkilangan iaitu sebanyak 223.1%.

Negara-negara penyumbang terbesar FDI adalah dari Singapura (RM43.5 bilion), Republik Korea (RM6.3 bilion), Belanda (RM5.1 bilion), Kepulauan Virgin British (RM3.0 bilion) dan Jepun (RM0.6 bilion).

Tuan Yang di-Pertua,

Untuk makluman, bagi tahun 2021 sahaja, Malaysia berjaya menarik pelaburan daripada syarikat-syarikat multinasional dalam industri berteknologi tinggi dan berintensif modal termasuk:

- i. syarikat AT&S AG yang berpangkalan di Austria yang komited untuk melabur sebanyak RM8.5 bilion bagi pengeluaran *integrated circuits (IC) substrates*;
- ii. SK Nexilis dari Republik Korea (RM4.2 bilion) pengeluar kerajang tembaga yang turut menghasilkan bateri kenderaan elektrik; dan
- iii. pembuat kereta terkemuka Jerman - Porsche AG (Porsche) telah mengumumkan keputusannya untuk membuka kilang di Kulim, Kedah, menjadikan Malaysia sebagai negara pertama di luar Eropah yang akan memasang kereta Porsche.

Selain itu, syarikat asing sedia ada yang terus mengembangkan operasi di Malaysia untuk tahun 2021, termasuk:

- i. Syarikat Taiyo Yuden dari Jepun iaitu pengeluar kapasitor seramik pelbagai lapisan (multilayer ceramic capacitor) akan menambah pelaburan mereka sebanyak RM680 juta di Sarawak;
- ii. Intel, syarikat pengeluar semikonduktor terbesar dunia dari Amerika Syarikat yang membawa masuk teknologi terkini Advance Assembly and Testing;
- iii. Bosch, syarikat Jerman yang mendirikan facility park untuk menguji komponen dan sensor semikonduktor; dan

- iv. B.Braun, syarikat Jerman yang mengembangkan pusat ujian globalnya untuk alat perubatan kerana kemampuan serta tenaga mahir yang ada di Malaysia.

Peningkatan FDI pada separuh pertama tahun 2021 membuktikan Malaysia kekal menjadi destinasi pelaburan utama. Keputusan strategik oleh syarikat-syarikat ini juga menunjukkan Malaysia kekal sebagai destinasi pelaburan strategik bagi syarikat gergasi antarabangsa.

MIDA melalui MITI, sebagai agensi pelaburan utama negara, akan terus memastikan pelaburan berkualiti dan berimpak tinggi dibawa masuk ke dalam Negara bagi mencapai matlamat Kerajaan untuk mewujudkan pekerjaan berpendapatan tinggi, memperluas rangkaian domestik dan mewujudkan ekosistem pelaburan dan perniagaan yang kondusif dan dinamik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 25 OKTOBER 2021 (ISNIN)

SOALAN

DATIN PADUKA DR. TAN YEE KEW [WANGSA MAJU] minta **MENTERI KANAN PERDAGANGAN ANTARABANGSA DAN INDUSTRI** menyatakan pelan dan peruntukan bagi mentransformasikan industri aeroangkasa seperti dicadangkan sebagai salah satu strategi untuk merangsangkan ekonomi.

JAWAPAN

Tuan Yang Di Pertua,

Industri aeroangkasa merupakan salah satu industri berteknologi tinggi yang strategik dan berimpak tinggi selain menjadi pemangkin kepada pertumbuhan ekonomi negara. Pelan Induk Industri Aeroangkasa Malaysia 2030 menetapkan sasaran untuk menjadikan industri aeroangkasa Malaysia sebagai hab aeroangkasa serantau serta antara lokasi utama rangkaian bekalan aeroangkasa global.

Pelan Induk 2030 ini dilaksanakan di dalam tiga fasa Rancangan Malaysia. Fasa pertama di bawah Rancangan Malaysia Ke-11 (RMKe-11) telah berjaya merekodkan jumlah purata pendapatan tahunan sebanyak RM13.74 bilion. Namun, pandemik COVID-19 telah menjejaskan momentum pertumbuhan industri ini disebabkan oleh pengurangan jumlah permintaan komponen dan peralatan pesawat oleh pihak pengeluar kelengkapan asal (OEM), permintaan aktiviti *Maintenance, Repair & Overhaul* (MRO) yang rendah akibat operasi syarikat-syarikat penerbangan yang minima selain penundaan aktiviti-aktiviti lain seperti latihan teknikal dan professional.

Justeru itu, fasa kedua pelaksanaan Pelan Induk Industri Aeroangkasa Malaysia 2030 di bawah Rancangan Malaysia Ke-12 (RMKe-12) akan memberikan tumpuan kepada pemulihan industri aeroangkasa pasca COVID-19 dan transformasi untuk menghasilkan produk dan perkhidmatan yang bernilai tinggi dengan dipacu oleh teknologi bagi melonjakkan pertumbuhan ekonomi. Industri aeroangkasa diunjur akan dapat menjana pendapatan sebanyak RM30 bilion menjelang tahun 2025 serta mewujudkan 30,000 peluang pekerjaan.

Kejayaan inisiatif aeroangkasa di bawah RMKe-12 bakal menjadi pemangkin pertumbuhan industri ini sepanjang pelaksanaan fasa ketiga dari tahun 2026 sehingga 2030. Menjelang 2030, pendapatan industri ini disasar akan mencapai RM55.2 bilion selain menyediakan pekerjaan berkemahiran tinggi untuk 32,000 rakyat negara ini. Dengan menerapkan teknologi digital dan Industri 4.0, Malaysia bakal berupaya untuk

menempatkan diri sebagai hab dan peneraju utama industri aeroangkasa di rantau Asia Tenggara dan menjadi sebahagian rangkaian bekalan utama dunia.

Tuan Yang Di Pertua,

Memandangkan industri aeroangkasa terkesan teruk akibat pandemik COVID-19, strategi bagi industri aeroangkasa di dalam RMKe-12 juga akan ditumpu kepada menyediakan landasan yang kukuh untuk pemulihan industri ini bagi merebut peluang pertumbuhan akan datang dalam pasaran global pasca pandemik. Terdapat lima (5) program khusus pembangunan industri aeroangkasa yang telah direncanakan oleh Kerajaan:

- i. Pertama, menubuhkan Pusat Kecemerlangan Aeroangkasa Kebangsaan di bawah Pejabat Penyelarasan Industri Aeroangkasa Kebangsaan (NAICO). Pusat kecemerlangan ini akan menjadi pusat depository teknologi dan pengetahuan industri aeroangkasa bagi pembangunan teknologi tinggi dan tenaga kerja mahir. Ini akan membantu transformasi industri aeroangkasa Malaysia menjadi lebih kompetitif di peringkat global dari segi teknologi, kepakaran dan kemahiran sumber manusia;
- ii. Kedua, menggalakkan promosi ekosistem industri aeroangkasa Malaysia bagi menjana pelaburan yang berkualiti tinggi. Penyertaan Malaysia di pameran perdagangan antarabangsa serta penganjuran pameran tempatan berkaitan industri aeroangkasa adalah penting untuk mempromosikan produk dan perkhidmatan syarikat tempatan. Program ini juga akan dapat meningkatkan eksport produk dan perkhidmatan industri aeroangkasa serta menembusi pasaran antarabangsa;
- iii. Ketiga, meningkatkan kompetensi melalui pelaksanaan transformasi digital dan Industri 4.0. Kerajaan sedang dalam usaha untuk membangunkan sistem digital aeroangkasa sebagai repositori data berpusat bagi operasi pesawat, MRO dan pembuatan aeroangkasa di Malaysia. Sistem digital ini akan

memudahkan pelbagai pihak berkepentingan untuk mengakses maklumat permintaan dan penawaran bagi rantai bekalan pada masa nyata. Inisiatif ini juga diharapkan dapat menyokong syarikat Tier-1 dan Tier-2 untuk memperbaiki struktur kos dan mengekalkan daya saing syarikat di peringkat global;

- iv. Keempat, membangunkan bahan api berasaskan bio untuk penerbangan mampan. Usaha akan dilaksanakan untuk menjadikan Malaysia sebagai pengeluar bahan api biojet melalui penyelidikan dan teknologi tempatan. Pelaksanaan inisiatif ini akan memberi kesan berganda kepada sektor lain terutamanya dalam pembekalan bahan mentah bagi bahan api biojet; dan
- v. Kelima, melaksanakan pensijilan *Aerospace Quality Management System* di bawah SIRIM Berhad bagi pensijilan standard AS9100, AS9110 dan AS9120. Pensijilan dan pencapaian standard adalah amat penting bagi industri aeroangkasa dan syarikat yang dipersijilkan akan mampu untuk bersaing di pasaran antarabangsa terutamanya bagi pembidaan kontrak.

Tuan Yang Di Pertua,

Industri aeroangkasa merupakan gerbang kepada industri bernilai tinggi lain seperti peranti perubatan termaju dan robotik kerana mendorong kepada aktiviti-aktiviti Penyelidikan dan Pembangunan (R&D) serta memacu kepada peningkatan teknologi dalam rantai bekalan. Seperti di negara-negara maju, industri ini menyokong kemajuan dalam industri berteknologi tinggi yang lain seperti Elektrik & Elektronik (E&E), Semikonduktor, Mesin & Peralatan (M&E), Perisian dan Ketenteraan. Tumpuan kepada pembangunan industri aeroangkasa di dalam RMKe-12 bakal menjadi pemangkin kepada pemulihan ekonomi pasca COVID-19 dan menerajui transformasi Industri 4.0 negara selain mencipta peluang ekonomi *deep technology* yang baharu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : DATUK MOHD AZIS BIN JAMMAN
[SEPANGGAR]**

TARIKH : 25 OKTOBER 2021 (ISNIN)

SOALAN

DATUK MOHD AZIS BIN JAMMAN [SEPANGGAR] minta **MENTERI KANAN PERDAGANGAN ANTARABANGSA DAN INDUSTRI** menyatakan strategi yang dilaksanakan Kementerian untuk menggandakan pertumbuhan dan mempergiatkan pembangunan industri di Sabah bagi tempoh jangka pendek dan panjang pasca pandemik COVID-19.

JAWAPAN

Tuan Yang di-Pertua,

MITI dan Agensi sentiasa mengambil langkah-langkah proaktif dalam usaha untuk menggandakan pertumbuhan ekonomi melalui pembangunan industri di semua negeri di Malaysia, termasuk menarik pelaburan di dalam sektor khusus di sesebuah negeri.

Antara faktor-faktor yang mendorong kepada pemilihan sesebuah negeri sebagai lokasi pelaburan adalah ketersediaan infrastruktur yang kukuh, tenaga kerja, bekalan utiliti yang stabil serta kesalinghubungan atau *connectivity* kepada fasiliti pelabuhan. Industri di Sabah kebanyakannya tertumpu kepada industri di peringkat hulu atau berasaskan *primary resources* seperti kelapa sawit, minyak dan gas, kayu dan perikanan. Oleh yang demikian, dalam mempergiatkan usaha

menarik pelaburan dan membangunkan industri pembuatan di Sabah, Kerajaan akan meningkatkan kemudahan infrastruktur di kawasan perindustrian seperti di Sipitang Oil & Gas Industrial Park (SOGIP), pembangunan lebuh raya Pan Borneo bagi melancarkan hubungan logistik serta mewujudkan lebih banyak industri hiliran bagi merancakkan aktiviti nilai tambah sektor pembuatan.

Baru-baru ini, Kerajaan telah berjaya menarik pelaburan berteknologi tinggi menerusi Syarikat SK Nexilis dari Korea Selatan untuk melabur di negeri Sabah dengan nilai pelaburan berjumlah RM4.3 billion yang dijangka akan memulakan operasi pada tahun 2023. SK Nexilis merupakan pengeluar kerajang tembaga (*electro-deposited copper foil*) bagi pengeluar bateri kenderaan elektrik (*Electric Vehicle - EV*). Pelaburan ini bakal mewujudkan 400 peluang pekerjaan kepada rakyat tempatan dan disasar untuk memperkukuhkan ekosistem pembangunan pengeluaran kenderaan elektrik seterusnya menjadikan Malaysia menjadi hab pengeluaran kenderaan EV.

Tuan Yang di-Pertua,

Kesinambungan perniagaan dan pembangunan industri pasca pandemik COVID-19 memerlukan kerjasama erat di antara Kerajaan Pusat dan Kerajaan Negeri. Bagi memastikan kelangsungan aktiviti sektor pembuatan seperti yang digariskan dalam Pelan Pemulihan Negara (PPN), MITI telah melaksanakan inisiatif jangka masa pendek seperti berikut:

- i. Kelulusan operasi bagi sektor pembuatan melalui sistem CIMS3.0 berdasarkan Fasa PPN;
- ii. Program Imunisasi Industri COVID-19 Kerjasama Awam-Swasta (PIKAS) yang dilancarkan pada 16 Jun 2021 sebagai Fasa 4 Program Imunisasi COVID-19 Kebangsaan (PICK); dan
- iii. Program Safe@Work bagi menggalakkan langkah-langkah kesihatan awam yang komprehensif supaya dilaksanakan secara sukarela oleh majikan bagi menangani penularan wabak COVID-19

di kilang-kilang. Insentif yang diberikan dibawah program ini adalah berupa potongan cukai tambahan kepada syarikat dalam sektor perkilangan dan perkhidmatan yang berkaitan sehingga RM50,000 bagi perbelanjaan sewaan premis penginapan atau kemudahan tempat tinggal pekerja.

Bagi memastikan perkembangan secara mapan industri negara, beberapa inisiatif jangka panjang sedang dilaksanakan. Antaranya:

- melaksanakan dasar pelaburan baharu berdasarkan Aspirasi Pelaburan Nasional yang menyasarkan pelaburan dengan tahap kompleksiti ekonomi tinggi yang berupaya untuk menjana peluang pekerjaan berkemahiran tinggi serta pembangunan rantai bekalan industri secara menyeluruh.
- menganjurkan misi perdagangan dan pelaburan ke luar negara yang diketuai oleh YB Menteri Kanan MITI bertujuan untuk meningkatkan pelaburan dalam sektor-sektor yang disasarkan melalui pendekatan ekosistem;
- menawarkan pelbagai insentif cukai bagi menarik pelaburan langsung asing (FDI) dan pelaburan tempatan termasuk memperkenalkan skim insentif cukai di bawah Pelan Jana Semula Ekonomi Negara (PENJANA) yang disasar dapat meningkatkan pelaburan domestik dan asing selain menarik syarikat multinasional untuk memindahkan operasi mereka ke Malaysia;
- membangunkan ekosistem rantai bekalan tempatan dengan menganjurkan beberapa program rantai bekalan bertujuan untuk mengukuhkan ekosistem rantai bekalan di antara syarikat-syarikat tempatan dan syarikat multinasional agar syarikat-syarikat tempatan terus mendapat peluang perniagaan dan pembekalan daripada projek-projek pelaburan syarikat-syarikat multinasional;
- menganjurkan sesi dialog secara kerap antara MITI/MIDA dengan Dewan Perdagangan / Perniagaan (*Business Chambers*), Kedutaan / Pesuruhjaya Tinggi dan persatuan-persatuan industri bagi mencari

penyelesaian kepada cabaran dan halangan yang dihadapi oleh pelabur dalam melaksanakan projek;

- memudahkan proses kelulusan dan mempercepatkan pelaksanaan projek pengilangan dan perkhidmatan melalui 'Project Acceleration and Coordination Unit' (PACU) MIDA; dan
- Pusat Sehenti (*One Stop Centre* - OSC) di MIDA untuk menilai permohonan dari pelawat perniagaan jangka pendek yang layak untuk memasuki Malaysia bagi tujuan perdagangan dan pelaburan. Inisiatif ini dikendalikan oleh MIDA bersama-sama wakil dari Jabatan Imigresen, Kementerian Kesihatan (KKM) dan MITI untuk membolehkan pelawat perniagaan dan pelabur terus memasuki Malaysia dengan pematuhan SOP yang ketat serta pengesahan kesihatan supaya rancangan pelaburan berjalan dengan lancar.

MIDA, sebagai agensi pelaburan utama negara sentiasa bekerjasama erat dengan semua Agensi Pelaburan di peringkat negeri dan Koridor Ekonomi dalam menarik pelaburan. Di Sabah, MIDA sentiasa bekerjasama dengan Kementerian Perdagangan Antarabangsa & Industri, Invest Sabah, Terminal Perindustrian dan Kementerian Pembangunan Perindustrian Sabah dan *Sabah Economic Development and Investment Authority* (SEDIA). Namun, pemilihan kawasan pelaburan adalah tertakluk kepada keputusan pelabur itu sendiri berdasarkan pelbagai faktor pertimbangan pelabur tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI HASANUDDIN BIN MOHD
YUNUS [HULU LANGAT]**

TARIKH : 25 OKTOBER 2021 (ISNIN)

SOALAN

DATUK HAJI HASANUDDIN BIN MOHD YUNUS [HULU LANGAT] minta **PERDANA MENTERI** menyatakan apakah kriteria profesional atau ijazah sarjana tertentu untuk melantik Penasihat Khas Bertaraf Menteri kepada Perdana Menteri, serta adakah penasihat khas ini diperuntukan dengan elaun untuk membantu rakyat.

JAWAPAN

**YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, Penasihat Khas Bertaraf Menteri adalah individu-individu yang dilantik dalam kalangan mereka yang mempunyai jaringan hubungan, pengalaman dan kepakaran tertentu dalam hal-hal berkaitan dengan skop tugas yang boleh memberi faedah kepada usaha-usaha memajukan kepentingan negara. Tiada pengkhususan ijazah sarjana ditetapkan sebagai syarat perlantikan ke jawatan tersebut.
2. Dalam hal ini, taraf Menteri yang diberikan (sekiranya ada) adalah secara pentadbiran. Ia merupakan penghormatan kepada jawatan tersebut dan tidak sama dengan taraf Menteri seperti yang diperuntukkan di bawah Perkara 43(2)(b) Perlembagaan Persekutuan. Penasihat Khas juga tidak disediakan elaun yang dikhususkan untuk membantu rakyat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB TUAN SU KEONG SIONG
[KAMPAR]**

TARIKH : 25 OKTOBER 2021

SOALAN

YB Tuan Su Keong Siong minta **PERDANA MENTERI** menyatakan langkah-langkah dan/atau pelan tindakan yang di susun untuk mencapai matlamat atau konsep “Keluarga Malaysia” yang di ketengahkan oleh Kerajaan. Nyatakan dengan jelas konsep dan model “Keluarga Malaysia” yang akan dilaksanakan oleh Kerajaan.

JAWAPAN

**DIJAWAB OLEH YB DATUK DR. ABd LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Konsep dan falsafah Keluarga Malaysia diperkenalkan oleh YAB Perdana Menteri Malaysia Ke-9 dalam ucapan sulung beliau pada 22 Ogos 2021. Konsep Keluarga Malaysia diambil kerana frasa ini lebih bersifat inklusif di mana ia merentasi sempadan agama, bangsa dan kaum dan merangkumi semua lapisan usia, anak muda sehinggalah ke warga emas. Konsep Keluarga Malaysia ini diketengahkan sebagai falsafah kepada keutuhan sesebuah keluarga yang merupakan satu entiti yang saling melengkapi, umpama anggota tubuh yang saling memerlukan di antara satu sama lain. Matlamat yang ingin dijelaskan melalui konsep ini adalah untuk semua rakyat Malaysia tanpa mengira

agama dan bangsa berganding bahu dan bekerjasama untuk memulih dan membangunkan negara daripada impak-impak negatif akibat pandemik CoVID-19. Model Keluarga Malaysia ini akan mengukur keberhasilan kebahagiaan terhadap produk/perkhidmatan yang dilaksanakan akan dinilai berdasarkan kepuasan dan kegembiraan penerima produk/perkhidmatan tersebut.

2. Langkah-langkah dan/atau pelan tindakan yang disusun untuk mencapai matlamat Keluarga Malaysia adalah dengan memperkenalkan produk-produk Keluarga Malaysia seperti Skwad Keluarga Malaysia, Pusat Ekonomi Digital Keluarga Malaysia dan lain-lain inisiatif yang akan memberi impak kepada keberhasilan kebahagiaan rakyat secara menyeluruh. Pelaksanaan produk-produk Keluarga Malaysia ini akan diukur prestasinya melalui Petunjuk Prestasi Utama dan juga Keberhasilan Kebahagiaan kepada pihak-pihak berkepentingan terutamanya rakyat yang merupakan penerima perkhidmatan produk-produk tersebut.

3. Pelan Tindakan yang lebih komprehensif sedang dibangunkan dalam tempoh 6 bulan. Di samping itu, bagi menyemarakkan lagi konsep Keluarga Malaysia agar diterima dan menjadi sebutan oleh rakyat pelbagai peringkat, hashtag atau slogan Keluarga Malaysia akan sentiasa diuar-uarkan supaya pernyataan tersebut sentiasa terpahat di sanubari setiap ahli Keluarga Malaysia sebagai pegangan yang akan diterjemahkan dalam menjalani kehidupan seharian.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI UTAMA HAJI MUKHRIZ BIN TUN
DR. MAHATHIR [JERLUN]**

TARIKH : 25 OKTOBER 2021 (ISNIN)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **PERDANA MENTERI** menyatakan halangan terhadap cadangan untuk mengasingkan jawatan Pendakwa Raya dari Peguam Negara, dan kenapa kedua-dua pegawai tinggi ini tidak diletakkan di bawah kuasa Parlimen, dan bukan Perdana Menteri.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, pada ketika ini Kerajaan melalui Jabatan Peguam Negara telah menjalankan Kajian Pengasingan Peranan Pendakwa Raya dan Peguam Negara yang merupakan inisiatif di bawah Tonggak 1 Kajian Separuh Penggal Rancangan Malaysia Kesebelas. Inisiatif tersebut juga turut dimasukkan sebagai Perkara 4.1.5 Pelan Antirasuah Nasional (NACP) 2019-2023. Kajian terperinci tersebut telah melihat amalan terbaik global dan mengkaji secara mendalam sistem dan struktur pendakwaan di 9 buah negara.

Hasil kajian tersebut telah dimuktamadkan dan cadangan pindaan Perlembagaan serta undang-undang lain yang berkaitan juga telah dikenal pasti. Turut disediakan dalam laporan kajian tersebut ialah struktur Pejabat Pendakwa Raya yang akan ditubuhkan kelak.

Seperti Ahli Yang Berhormat sedia maklum inisiatif ini turut berada dalam NACP dan tempoh pelaksanaan NACP adalah sehingga 2023. Apabila laporan kajian ini siap sepenuhnya, ia akan dibentangkan kepada kerajaan semula untuk keputusan sama ada akan melaksanakan agenda yang berkaitan cadangan memisahkan fungsi Peguam Negara dan Pendakwa Raya.

Memandangkan cadangan pemisahan ini memerlukan pindaan kepada Perlembagaan Persekutuan, maka Kerajaan perlu berhati-hati dalam perkara yang menyentuh kuasa Pendakwa Raya di bawah Perkara 145 Perlembagaan Persekutuan dan keanggotaan Pendakwa Raya dalam Suruhanjaya Perkhidmatan Kehakiman & Perundangan di bawah Perkara 138 Perlembagaan Persekutuan.

Selanjutnya, isu sama ada terdapat halangan dalam melaksanakan pengasingan jawatan Pendakwa Raya dan Peguam Negara masih belum dapat dikenal pasti dan juga keperluan untuk meletakkan Pendakwa Raya di bawah kuasa Parlimen dan bukan Perdana Menteri belum dapat dimuktamadkan sehingga diadakan pembentangan hasil kajian kepada pihak Kerajaan.

Berhubung dengan cadangan supaya Peguam Negara menjadi anggota Jemaah Menteri, Perkara 145 Perlembagaan Persekutuan tidak menghalang anggota Jemaah Menteri untuk dilantik sebagai Peguam Negara sekiranya calon tersebut memenuhi prasyarat kelayakan seorang hakim Mahkamah Persekutuan di bawah Perkara 123 Perlembagaan Persekutuan. Berdasarkan Perkara 123 Perlembagaan Persekutuan, syarat kelayakan seseorang untuk dilantik sebagai hakim Mahkamah Persekutuan, Mahkamah Rayuan dan Mahkamah Tinggi adalah seperti yang berikut:

- (a) seorang warganegara; dan
- (b) bagi tempoh sepuluh tahun sebelum pelantikannya, dia telah menjadi peguam bela bagi mahkamah-mahkamah itu atau mana-mana satu daripada mahkamah itu, atau menjadi anggota perkhidmatan kehakiman dan perundangan Persekutuan atau perkhidmatan perundangan sesuatu Negeri, atau pada suatu masa menjadi peguam bela dan pada suatu masa lain berkhidmat sebagai anggota perkhidmatan kehakiman dan perundangan Persekutuan atau perkhidmatan perundangan sesuatu Negeri.

Setakat ini dua orang anggota Jemaah Menteri pernah dilantik sebagai Peguam Negara iaitu Tan Sri Datuk Haji Abdul Kadir bin Yusof (1963-1977) dan Tan Sri Datuk Hj Hamzah bin Datuk Abu Samah (1977-1980).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 25 OKTOBER 2021 (ISNIN)

SOALAN :

Minta **PERDANA MENTERI** menyatakan langkah dalam menyusun semula anak Syarikat Yadim iaitu Lembaran Yadim Sdn. Bhd.

JAWAPAN

**YB SENATOR HAJI IDRIS BIN HAJI AHMAD,
MENTERI DI JABATAN PERDANA MENTERI
(HAL EHWAL AGAMA)**

Tuan Yang di-Pertua,

1. Lembaran YADIM Sdn Bhd (687699-D), atau nama ringkasnya LYSB yang dimiliki sepenuhnya oleh Yayasan Dakwah Islamiah Malaysia (YADIM) merupakan sebuah anak syarikat yang telah diperbadankan di Malaysia pada 8 April 2005 dan dimiliki oleh YADIM pada tahun 2010.
2. LYSB bertanggungjawab mentadbir urus dari segi penyewaan Aset Tak Alih YADIM, penyediaan perjanjian sewaan, kutipan hasil sewaan serta kutipan hutang tertunggak pihak penyewa. Berdasarkan bidang operasi perniagaan utama yang ditumpukan oleh LYSB sejak penubuhannya, LYSB telah memperolehi pendapatan yang bertumbuh secara tidak eksponensial (*non-exponential growth*) pada kadar purata

64% serta turut mengalami kerugian pada kadar purata 39% pada tahun 2014 hingga 2019.

3. Berdasarkan situasi tersebut, LYSB telah mengambil langkah untuk menstrukturkan semula syarikat secara bertahap dengan fasa pertama penstrukturkan memfokuskan kepada struktur asas governan (tadbir urus), operasi dan model perniagaan syarikat sepertimana yang telah diangkat dalam mesyuarat Jawatankuasa Khas Kewangan, Pelaburan dan Dana Infaq YADIM Bilangan 2/2020.

4. Antara langkah yang telah diambil adalah seperti berikut:

- a) Perubahan terhadap struktur asas governan syarikat serta menggunakan kod tatakelola Akta Syarikat 2016 dan pekeliling kerajaan yang bersesuaian;
- b) Penstrukturkan semula modal syer dan modal berbayar syarikat serta perubahan struktur operasi LYSB dengan pengambilan pegawai dan kakitangan sendiri; dan
- c) Mempelbagaikan portfolio perniagaan kepada peruncitan dan pemborongan (YADIMart), perdagangan, penyewaan hartanah serta pelaburan.

5. Kesemua cadangan-cadangan ini telah dikemukakan dan diluluskan oleh Mesyuarat Ahli Lembaga Pemegang Amanah YADIM. Berdasarkan kepada pencapaian semasa yang diperolehi oleh LYSB, dapat disimpulkan bahawa pelan pemulihan dan penstrukturkan semula syarikat bergerak dalam hala tuju yang positif. LYSB telah berjaya mencatatkan pendapatan terakru sehingga Julai 2021 berjumlah RM2,271,313.14 sejak penyusunan semula yang dilakukan bermula pada bulan Ogos 2020.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 25 OKTOBER 2021 (ISNIN)

SOALAN

Minta **PERDANA MENTERI** menyatakan berapa lama sekatan-sekatan terhadap rakyat yang tidak lengkap vaksin di tempat-tempat awam dan di pejabat-pejabat akan diteruskan oleh pihak Kerajaan.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Dalam usaha untuk memastikan negara berjaya keluar daripada pandemik COVID-19 dengan selamat atau *#reopeningsafely*, kita perlu menerima hakikat bahawa kita semua terpaksa hidup bersama virus COVID-19. Kita perlu sentiasa berhati-hati dan tidak boleh untuk cepat berasa selesa dan bersikap sambil lewa dalam menjalankan aktiviti seharian kita.

2. Justeru, selain terus mengingatkan rakyat untuk mengamalkan SOP, Kerajaan akan sentiasa berpendirian tegas dalam mengenakan dan meneruskan sekatan-sekatan bagi memastikan penularan jangkitan COVID-19 dapat dibendung dan tidak menjangkiti golongan berisiko tinggi seperti golongan emas dan kanak-kanak. Vaksin COVID-19 terbukti berkesan mengurangkan kes kritikal dan kematian untuk kita

meneruskan kehidupan dengan selamat. Ingat, "Kita tidak selamat sehingga semua selamat".

3. Kerajaan juga telah bersetuju agar kemudahan vaksinasi lengkap untuk golongan dewasa ketika ini diperluaskan kepada golongan remaja yang telah divaksin lengkap. Ini bermakna syarat vaksinasi lengkap bagi remaja berumur antara 12 hingga 17 tahun akan dinyatakan di dalam semua SOP dan akan dilaksanakan sepenuhnya sekitar pertengahan November.

4. Justeru, individu yang belum lengkap vaksin kecuali yang tidak boleh divaksin atas faktor kesihatan, amat disaran mengambil vaksin dengan segera kerana ianya dapat melindungi diri dan orang lain serta mengelak dari kemunculan varian baharu yang lebih bahaya dan mengancam nyawa.

5. Kerajaan juga telah mewajibkan semua pegawai perkhidmatan awam Persekutuan untuk mengambil vaksin bagi memberi keyakinan dan jaminan kepada orang awam serta melancarkan penyampaian perkhidmatan awam kepada rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATO' JOHARI BIN ABDUL [SUNGAI
PETANI]**

TARIKH : 25 OKTOBER 2021 (ISNIN)

SOALAN :

DATO' JOHARI BIN ABDUL [SUNGAI PETANI] minta **PERDANA
MENTERI** menyatakan adakah Kerajaan berhasrat untuk membuat
perubahan dengan memisahkan entiti Peguam Negara dan Pendakwa
Raya. Jika tidak, apakah yang menghalang pemisahan ini.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, pada ketika ini Kerajaan melalui Jabatan Peguam Negara telah menjalankan Kajian Pengasingan Peranan Pendakwa Raya dan Peguam Negara yang merupakan inisiatif di bawah Tonggak 1 Kajian Separuh Penggal Rancangan Malaysia Kesebelas. Inisiatif tersebut juga turut dimasukkan sebagai Perkara 4.1.5 Pelan Antirasuah Nasional (NACP) 2019-2023. Kajian terperinci tersebut telah melihat amalan terbaik global dan mengkaji secara mendalam sistem dan struktur pendakwaan di 9 buah negara.

Hasil kajian tersebut telah dimuktamadkan dan cadangan pindaan Perlembagaan serta undang-undang lain yang berkaitan juga telah dikenal pasti. Turut disediakan dalam laporan kajian tersebut ialah struktur Pejabat Pendakwa Raya yang akan ditubuhkan kelak.

Seperti Ahli Yang Berhormat sedia maklum inisiatif ini turut berada dalam NACP dan tempoh pelaksanaan NACP adalah sehingga 2023. Apabila laporan kajian ini siap sepenuhnya, ia akan dibentangkan kepada kerajaan semula untuk keputusan sama ada akan melaksanakan agenda yang berkaitan cadangan memisahkan fungsi Peguam Negara dan Pendakwa Raya.

Memandangkan cadangan pemisahan ini memerlukan pindaan kepada Perlembagaan Persekutuan, maka Kerajaan perlu berhati-hati dalam perkara yang menyentuh kuasa Pendakwa Raya di bawah Perkara 145 Perlembagaan Persekutuan dan keanggotaan Pendakwa Raya dalam Suruhanjaya Perkhidmatan Kehakiman & Perundangan di bawah Perkara 138 Perlembagaan Persekutuan.

Selanjutnya, isu sama ada terdapat halangan dalam melaksanakan pengasingan jawatan Pendakwa Raya dan Peguam Negara masih belum dapat dikenal pasti dan juga keperluan untuk meletakkan Pendakwa Raya di bawah kuasa Parlimen dan bukan Perdana Menteri belum dapat dimuktamadkan sehingga diadakan pembentangan hasil kajian kepada pihak Kerajaan.

Berhubung dengan cadangan supaya Peguam Negara menjadi anggota Jemaah Menteri, Perkara 145 Perlembagaan Persekutuan tidak menghalang anggota Jemaah Menteri untuk dilantik sebagai Peguam Negara sekiranya calon tersebut memenuhi prasyarat kelayakan seorang hakim Mahkamah Persekutuan di bawah Perkara 123 Perlembagaan Persekutuan. Berdasarkan Perkara 123 Perlembagaan Persekutuan, syarat kelayakan seseorang untuk dilantik sebagai hakim Mahkamah Persekutuan, Mahkamah Rayuan dan Mahkamah Tinggi adalah seperti yang berikut:

- (a) seorang warganegara; dan
- (b) bagi tempoh sepuluh tahun sebelum pelantikannya, dia telah menjadi peguam bela bagi mahkamah-mahkamah itu atau mana-mana satu daripada mahkamah itu, atau menjadi anggota perkhidmatan kehakiman dan perundangan Persekutuan atau perkhidmatan perundangan sesuatu Negeri, atau pada suatu masa menjadi peguam bela dan pada suatu masa lain berkhidmat sebagai anggota perkhidmatan kehakiman dan perundangan Persekutuan atau perkhidmatan perundangan sesuatu Negeri.

Setakat ini dua orang anggota Jemaah Menteri pernah dilantik sebagai Peguam Negara iaitu Tan Sri Datuk Haji Abdul Kadir bin Yusof (1963-1977) dan Tan Sri Datuk Hj Hamzah bin Datuk Abu Samah (1977-1980).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI MUJAHID BIN YUSOF RAWA
[PARIT BUNTAR]**

TARIKH : 25 OKTOBER 2021 | ISNIN

SOALAN

DATUK SERI DR. MUJAHID BIN YUSOF RAWA [PARIT BUNTAR] minta **PERDANA MENTERI** menyatakan apakah sudah ada inisiatif pindaan Akta Tabung Haji (1995) untuk meletakkan pengurusan risiko aset Tabung Haji di bawah kawalan Bank Negara.

JAWAPAN

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI
(HAL EHWAL AGAMA)**

Tuan Yang Di-Pertua,

Untuk makluman Ahli Yang Berhormat,

1. Usaha untuk mengkaji semula/meminda Akta TH telah dimulakan sejak tahun 2019 di mana Lembaga TH telah menubuhkan Pasukan Petugas (Task Force) di peringkat Lembaga untuk menjalankan kajian menyeluruh ke atas Akta TH. Input serta cadangan-cadangan pindaan dan penambahbaikan telah dikumpul dan dibentangkan di peringkat Mesyuarat Jawatankuasa Pengurusan Eksekutif TH kemudiannya.

2. Pada 12 Ogos 2021, Kerajaan telah mengumumkan inisiatif Perkukuh Pelaburan Rakyat (PERKUKUH) yang melibatkan semua Syarikat Pelaburan Berkaitan Kerajaan (GLIC), termasuk Tabung Haji. PERKUKUH dizahirkan untuk mencapai lima hasil utama iaitu, memperjelas mandat setiap GLIC; peningkatan fokus kepada pelaburan pembangunan untuk memacu pertumbuhan baharu; menyemarakkan sektor swasta; menyiap siaga GLIC bagi masa hadapan melalui peningkatan tadbir urus dan keupayaan; serta mengukuhkan perlindungan sosial dan ketahanan fiskal GLIC.

3. Pelabur institusi seperti **TH** bertanggungjawab untuk menguruskan simpanan umat Islam yang mahu menunaikan ibadah haji, iaitu mandat penubuhannya pada tahun 1963. Salah satu dari inisiatif PERKUKUH melibatkan usaha untuk mengukuhkan Akta Tabung Haji 1995, menambahbaik model operasi serta aspek tadbir urus **TH**.

4. Aspek utama yang akan diberi penekanan dalam kajian semula/pindaan Akta TH ini adalah seperti berikut:-

- i) tadbir urus TH - bagi mengekalkan standard tertinggi dalam tadbir urus korporat serta pengurusan berhemat;
- ii) kuasa-kuasa dan peraturan-peraturan berkaitan deposit dan pengeluaran, kewangan, pentadbiran Kumpulan Wang (seperti yang didefinisikan di bawah Akta TH) pengurusan aset, haji, dan lain-lain.
- iii) bagi tujuan menyelaraskan kandungan Akta dengan model perniagaan terbaharu TH (model operasi dan kewangan yang berdaya maju);
- iv) pemodenan bahagian-bahagian lain di dalam Akta - bagi menjadikan Akta TH selaras dengan akta badan-badan berkanun lain yang seumpama.

5. Usaha ini masih lagi dalam peringkat kajian awal dan akan melibatkan pelbagai pihak berkepentingan, termasuk pendeposit **TH**. Perkembangan mengenai inisiatif ini akan diumumkan oleh **TH** pada masa yang sesuai kelak.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS

PERTANYAAN : LISAN

DARIPADA : PUAN VIVIAN WONG SHIR YEE [SANDAKAN]

TARIKH : 25 OKTOBER 2021 (ISNIN)

SOALAN

PUAN VIVIAN WONG SHIR YEE [SANDAKAN] minta **MENTERI PERUSAHAAN PERLADANGAN DAN KOMODITI** menyatakan bagaimana Kementerian membantu sektor minyak sawit, khususnya di Sabah, untuk mengatasi masalah kekurangan tenaga kerja yang sangat ketara ketika ini yang disebabkan oleh sekatan perjalanan.

JAWAPAN

Tuan Yang di-Pertua,

Sekatan perjalanan yang dilakukan oleh kerajaan bagi mengekang penularan COVID-19 telah menyebabkan sektor perladangan mengalami masalah kekurangan tenaga kerja yang lebih ketara kerana sektor ini amat bergantung kepada pekerja asing. Bagi menangani masalah ini, kerajaan telah berusaha untuk menarik golongan belia dan pekerja tempatan termasuk dalam kalangan orang asli bagi mengisi kekosongan pekerjaan yang ditinggalkan oleh pekerja asing. Walau bagaimanapun, usaha ini dilihat tidak mendapat sambutan yang memberangsangkan daripada warga tempatan.

Oleh yang demikian, pelbagai usaha lain termasuk beberapa siri libat urus antara kementerian yang berkaitan dengan penggiat industri telah diadakan bagi mengatasi masalah ini. Melalui sesi libat urus ini, Kementerian Perusahaan dan Perladangan Komoditi melalui kementerian lain yang berkaitan telah berusaha untuk membawa masuk semula pekerja asing ke Malaysia bagi mengatasi masalah kekurangan tenaga kerja yang dilihat semakin serius.

Kemasukan semula pekerja asing ini diharap akan dapat mengurangkan masalah kekurangan tenaga kerja yang telah menjejaskan operasi kerja-kerja di ladang sawit. Walau bagaimanapun, kerajaan menyedari bahawa untuk jangka masa panjang, pergantungan yang tinggi kepada pekerja asing akan menjejaskan sektor tersebut. Untuk itu, kerajaan telah meningkatkan promosi penggunaan jentera di samping pembangunan modal insan.

Penubuhan Konsortium Penyelidikan Mekanisasi dan Automasi (MARCOP) diharapkan akan dapat membantu meningkatkan penggunaan teknologi dan jentera di ladang sawit dan mengubah landskap sektor perladangan daripada berintensifkan buruh kepada berintensifkan modal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : TUAN SANISVARA NETHAJI RAYER
A/L RAJAJI [JELUTONG]**

TARIKH : 25 OKTOBER 2021 (ISNIN)

SOALAN :

TUAN SANISVARA NETHAJI RAYER A/L RAJAJI [JELUTONG]
minta **PERDANA MENTERI** menyatakan adakah Kerajaan Persekutuan
bercadang untuk mengehadkan tempoh jawatan Perdana Menteri
kepada dua penggal.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Kerajaan komited dalam melaksanakan Transformasi Parlimen dan Pentadbiran Kerajaan untuk mengembalikan kestabilan politik demi menangani wabak COVID-19 dan memulihkan ekonomi negara. Transformasi kerajaan ini menunjukkan keikhlasan dan kejujuran Kerajaan dengan memaktubkan nilai-nilai murni dan muafakat merentasi pelbagai latar agama, kaum, dan budaya dalam konteks Keluarga Malaysia.

Antara kandungan di dalam Memorandum Persefahaman Transformasi dan Kestabilan Politik termasuklah cadangan bagi untuk mengehendkan tempoh jawatan Perdana Menteri kepada 10 tahun sahaja. Memandangkan ia merupakan satu pindaan kepada Perlembagaan Persekutuan, adalah penting satu kajian yang teliti dan menyeluruh perlu dilaksanakan terlebih dahulu sebelum Kerajaan membentangkan cadangan pindaan tersebut di Parlimen.

Kerajaan memberi jaminan bahawa semua yang termaktub di dalam *Confidence and Supply Agreement* (CSA) tersebut akan dilaksanakan dan diambil tindakan segera oleh pihak Kerajaan.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KETIGA,
PARLIMEN KEEMPAT BELAS

PERTANYAAN : LISAN

DARIPADA : TUAN CHAN FOONG HIN [KOTA KINABALU]

TARIKH : 25 Oktober 2021 (ISNIN)

SOALAN

TUAN CHAN FOONG HIN [KOTA KINABALU] minta **MENTERI PERUSAHAAN PERLADANGAN DAN KOMODITI** menyatakan apakah usaha Kementerian mengurangkan kebergantungan pekerja asing untuk sektor perladangan - dilaporkan seramai 32,000 buruh asing yang sudah lengkap divaksin akan dibawa masuk ke Malaysia sebagai pekerja dan penuai di ladang-ladang kelapa sawit di seluruh negara pada pertengahan bulan Oktober.

JAWAPAN

Tuan Yang di-Pertua,

Antara usaha Kementerian Perusahaan dan Perladangan Komoditi untuk mengurangkan kebergantungan pekerja asing untuk sektor perladangan adalah seperti berikut:

- i. Pembangunan Modal Insan melalui Kursus yang ditawarkan di Institut Perladangan dan Komoditi Malaysia (IMPAC) - Pembangunan modal insan bagi melahirkan tenaga kerja mahir di kalangan belia tempatan amat penting dalam sektor agrikomoditi bagi memastikan sektor ini terus berdaya saing dan mengurangkan kebergantungan kepada pekerja asing. Antara fokus utama kursus dan latihan yang ditawarkan oleh IMPAC adalah pendedahan penggunaan jentera mekanisasi secara menyeluruh.

- ii. memberikan insentif Skim Galakan Mekanisasi Industri Sawit (OPIMIS) kepada majikan untuk menggalakkan penggunaan mekanisasi bagi menarik minat pekerja tempatan. Dalam usaha untuk menggalakkan syarikat perladangan dan pekebun kecil menggunakan peralatan dan jentera perladangan, diskaun sehingga 20% ditawarkan bagi setiap jentera yang dibeli untuk kegunaan di ladang sawit di bawah OPIMIS. Kerajaan telah memperuntukkan sejumlah RM4.5 juta di bawah Rancangan Malaysia Kesebelas (RMKe-11) bagi melaksanakan skim ini; dan
- iii. menggalakkan kajian dan penyelidikan dalam bidang mekanisasi melalui Dana Mekanisasi Sawit. Dalam usaha untuk menggalakkan dan membiayai aktiviti penyelidikan berkaitan mekanisasi oleh institusi penyelidikan tempatan dan antarabangsa, peruntukan Dana Mekanisasi Sawit secara padanan (*matching grant*) berjumlah RM30 juta telah diwujudkan. Melalui penyelidikan yang berterusan adalah diharap lebih banyak jentera yang lebih sesuai pada kos yang rendah dapat direkapipta dan diguna pakai bagi meningkatkan produktiviti dan seterusnya mengurangkan penggunaan tenaga buruh.

Selain langkah-langkah tersebut, Kementerian turut mengalu-alukan penglibatan agensi pekerjaan tempatan untuk tampil dan membantu Kerajaan dalam menggalakkan lebih ramai rakyat tempatan bekerja di sektor ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : LISAN

**DARIPADA : TUAN CHAN MING KAI
[ALOR SETAR]**

TARIKH : 25 OKTOBER 2021 (ISNIN)

SOALAN

TUAN CHAN MING KAI minta **PERDANA MENTERI** menyatakan kadar kemiskinan terkini bagi Bumiputera Orang Asli Semenanjung, Bumiputera Sabah dan Bumiputera Sarawak serta sejauh mana rekod dan prestasi pencapaian agensi seperti AIM, TEKUN, MARA dan PUNB khususnya ke atas Bumiputera Bukan Melayu tersebut.

JAWAPAN

Tuan Yang di-Pertua,

1. Pada tahun 2019, kadar kemiskinan mutlak di peringkat nasional Bumiputera adalah 7.2 peratus berbanding etnik Cina pada 1.4 peratus dan India 4.8 peratus. Manakala bagi masyarakat Orang Asli, kadar kemiskinan mutlak adalah 33.6 peratus. Seterusnya kadar kemiskinan mutlak Bumiputera di Sabah adalah 22.7 peratus manakala di Sarawak pula adalah 11.2 peratus.

2. Untuk makluman ahli yang berhormat, Perbadanan Usahawan Nasional Berhad (PUNB) telah meluluskan sebanyak 434 pembiayaan perniagaan sejak tahun 2000 hingga September 2021 kepada Bumiputera bukan Melayu yang terdiri daripada Orang Asli, Anak Negeri Sabah dan Bumiputera Sarawak. Secara keseluruhan, jumlah pembiayaan yang telah disediakan oleh Kerajaan melalui PUNB kepada golongan ini adalah berjumlah RM115.73 juta.

SOALAN NO: 33

3. Di bawah Majlis Amanah Rakyat (MARA) pula, seramai 170 usahawan Bumiputera bukan Melayu sedang menyewa premis perniagaan MARA di seluruh negara dari Januari hingga September 2021. Selain itu, dalam tempoh yang sama sebanyak 90 usahawan dalam kategori ini telah menerima pembiayaan sebanyak RM4.34 juta melalui Program Pembangunan Keusahawanan MARA dan Program Pembangunan Keusahawanan Belia MARA.

4. TEKUN Nasional merupakan salah sebuah agensi yang memfokuskan kepada bantuan pembiayaan perniagaan untuk usahawan mikro. Ia turut menyediakan pembiayaan kepada usahawan Orang Asli Semenanjung, Anak Negeri Sabah dan Bumiputera Sarawak. Dari Januari hingga September 2021, TEKUN Nasional telah menyalurkan pembiayaan sebanyak RM47.5 juta kepada sejumlah 1,794 usahawan Orang Asli Semenanjung, Anak Negeri Sabah dan Bumiputera Sarawak.

5. Manakala, Amanah Ikhtiar Malaysia (AIM) menjalankan program Skim Pembiayaan Ikhtiar (SPI) yang melibatkan penyertaan golongan ini seramai 20,774 peserta dengan had nilai pembiayaan antara RM100 sehingga RM30,000. Dalam tempoh Januari hingga September 2021, sebanyak RM112.5 juta telah disalurkan melalui program ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB TUAN KARUPAIYA A/L MUTUSAMI
(PADANG SERAI)**

TARIKH : 25 OKTOBER 2021 (ISNIN)

SOALAN

TUAN KARUPAIYA A/L MUTUSAMI [PADANG SERAI] minta **MENTERI KANAN KERJA RAYA** menyatakan adakah Kementerian bercadang untuk menghapuskan tol di BKE, memandangkan rakyat yang berulang alik dari Kulim ke Pulau Pinang terpaksa mengeluarkan wang tol untuk bayaran 2 arah, ini membebankan mereka.

JAWAPAN

Tuan Yang Di-Pertua,

Untuk makluman Ahli Yang Berhormat, Kerajaan telah menjalankan beberapa kajian dan opsyen terbaik dalam pelbagai aspek bagi meringankan bebanan Kerajaan, pengguna lebuh raya dan syarikat konsesi. Ini bagi memastikan industri lebuh raya kekal relevan dan pada masa yang sama memberi keyakinan kepada pelabur dalam dan luar negara terhadap Kerajaan.

Untuk makluman Ahli Yang Berhormat, di antara tindakan yang telah dilaksanakan oleh Kerajaan di Lebuhraya Butterworth – Kulim (BKE) bagi meringankan bebanan pengguna dengan menangguhkan beberapa kenaikan kadar tol sejak tahun 2011 iaitu RM1.60 bagi kenderaan kelas 1 dan kadar tol ini telah dikekalkan sehingga Januari 2020. Sekiranya kadar tol dinaikkan seperti dijadual, kadar tol yang sepatutnya dibayar oleh pengguna adalah sebanyak RM1.80 bagi kenderaan kelas 1 dalam tempoh 2019 sehingga 2021. Kerajaan juga telah melaksanakan pengurangan kadar tol sebanyak 18% di Lebuhraya BKE berkuatkuasa pada 1 Februari 2020 melibatkan kenderaan kelas 1, 4 dan 5 yang mana selepas pengurangan, pengguna hanya perlu membayar sebanyak RM1.31 bagi kenderaan kelas 1.

Sekiranya lebuh raya ini dimansuhkan, Kerajaan bukan sahaja perlu menanggung kos bayaran pampasan yang tinggi kepada syarikat konsesi tetapi turut menanggung kos penyenggaraan selepas lebuh raya diambil alih. Ini akan memberi implikasi kewangan yang tinggi dan sebarang keputusan untuk memansuhkan tol di sesebuah lebuh raya memerlukan kajian terperinci dalam pelbagai aspek.

Dalam situasi ekonomi negara sekarang, sewajarnya sebarang peruntukan yang ada digunakan untuk memacu pertumbuhan ekonomi, menjaga kebajikan serta melestarikan kehidupan rakyat. Di samping itu,

Kerajaan juga menggalakkan syarikat konsesi mengemukakan cadangan penstrukturan lebuh raya di mana tiada kenaikan kadar tol sehingga tamat tempoh konsesi dan tidak melibatkan pampasan tunai daripada Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : YB TUAN CHONG CHIENG JEN (STAMPIN)

TARIKH : 25 OKTOBER 2021 (ISNIN)

SOALAN

TUAN CHONG CHIENG JEN [STAMPIN] minta **MENTERI KANAN KERJA RAYA** menyatakan apakah sebab simpang lampu trafik di Batu Tujuh Kuching perlu ditutup selama 3 bulan untuk pelaksanaan projek jejantas *fly-over* (sebahagian projek Pan Borneo Highway) di simpang tersebut. Apakah pampasan kontraktor perlu bayar atas kesulitan yang diakibatkan kepada orang awam selama ini.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Kerja Raya mengambil maklum aduan kesesakan jalan raya di Mile 7 yang disebabkan oleh penutupan sementara sebahagian jalan bagi tujuan kerja-kerja pembinaan di bawah Projek Lebuhraya Pan Borneo Sarawak.

Bagi mengurangkan kadar kesesakan di lokasi tersebut, tindakan-tindakan proaktif seperti berikut telah melaksanakan oleh Kementerian Kerja Raya melalui JKR Sarawak dan kontraktor yang dilantik:

- i) Menyediakan satu (1) laluan tambahan di Mile 7 berdekatan *Borneo House Museum*;
- ii) Bantuan polis trafik bagi kawalan lalu lintas pada waktu puncak (*peak hours*);
- iii) Mengemaskini Pelan Pengurusan Trafik berdasarkan situasi di tapak; dan
- iv) Memendekkan keseluruhan tempoh kerja-kerja pembinaan di lokasi tersebut daripada tiga (3) bulan kepada dua (2) bulan.

Jalan-jalan tersebut akan dibuka semula secara berperingkat setelah kerja-kerja pembinaan selesai seawal 11 Oktober 2021 bagi Mile 7. Sehubungan itu, Kementerian Kerja Raya memohon kerjasama dan kesabaran pengguna jalan raya dalam tempoh tersebut untuk mematuhi papan tanda jalan dan had kelajuan di lokasi-lokasi tersebut. Kerja-kerja pembinaan tersebut adalah sebahagian daripada inisiatif Kerajaan Persekutuan untuk menambahbaik kemudahan infrastruktur jalan raya khususnya bagi pergerakan pengguna jalan raya dari Kuching ke Serian. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS 2021**

PERTANYAAN : LISAN

**DARIPADA : TUAN HASSAN BIN ABDUL KARIM [PASIR
GUDANG]**

TARIKH : 25 OKTOBER 2021 (ISNIN)

SOALAN

Tuan HASSAN BIN ABDUL KARIM [PASIR GUDANG] minta PERDANA MENTERI menyatakan adakah terdapat dalam RMK-12 rancangan supaya ekonomi Malaysia tidak lagi mengeluarkan barang hasil kilang yang rendah nilainya tetapi Malaysia bertukar kepada menghasilkan barangan yang tinggi nilai supaya negara ini dapat mengurangkan pergantungan kepada pekerja asing.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Di bawah Rancangan Malaysia ke-12, strategi pertumbuhan dalam sektor pembuatan akan memberi tumpuan untuk mengeluarkan produk yang mempunyai nilai ditambah yang tinggi dan kompleks, terutama dalam industri elektrik dan elektronik (E&E), kimia dan produk kimia, jentera dan peralatan serta aeroangkasa.
2. Fokus akan diberi kepada usaha untuk menambah baik insentif sedia ada serta memperkenalkan mekanisme pembiayaan baharu untuk

menarik pelaburan berkualiti bagi menghasilkan lebih banyak produk yang mempunyai nilai ditambah yang tinggi. Insentif Elaun Modal Kelengkapan Automasi akan ditambah baik dari segi nilai dan mekanisme bagi membolehkan pengilang mempelbagaikan lagi produk yang mempunyai nilai ditambah yang tinggi dan kompleks. Di samping itu, senarai industri yang diberi insentif cukai di bawah Akta Penggalakan Pelaburan 1986 akan dikemas kini untuk menggalakkan industri mempelbagaikan jenis produk dan meningkatkan produktiviti.

3. Usaha juga akan dipergiat untuk menggalakkan syarikat tempatan menceburi industri masa hadapan bagi menghasilkan produk yang mempunyai nilai ditambah yang tinggi serta meningkatkan produktiviti secara berterusan dalam sektor pembuatan. Pusat kecemerlangan untuk industri masa hadapan akan ditubuhkan bagi menyelaraskan dan mengintegrasikan amalan terbaik dan penyelidikan serta menyediakan sokongan dan latihan. Pusat ini akan menjalinkan kerjasama strategik bagi mengoptimumkan sumber dalam menjalankan aktiviti R&D&C&I.

4. Kerajaan juga menetapkan matlamat untuk melonjakkan pertumbuhan produktiviti dengan memberi penekanan kepada usaha mempercepatkan peralihan industri berteraskan pembuatan termaju atau *advanced manufacturing* bagi meningkatkan nilai rantai yang lebih tinggi. Langkah ini juga diambil sebagai usaha untuk memperkukuh daya tahan semua ekonomi di Malaysia seterusnya meningkatkan produktiviti. Usaha akan diambil untuk memoden dan mendigitalkan operasi dan proses pembuatan sepanjang rantai nilai bagi mengurangkan kebergantungan kepada pekerja asing berkemahiran rendah

5. Pelaksanaan Dasar Negara Mengenai Industri 4.0 (Industry4WRD) dan Dasar Revolusi Perindustrian Keempat (4IR) Negara menyediakan inisiatif khusus, terutama dalam membangunkan keupayaan sistem *integrator* tempatan bagi menyediakan penyelesaian yang berinovasi berkaitan dengan pendigitalan proses pengeluaran. Di samping itu, pelaksanaan Program Penilaian Kesediaan juga akan ditambah baik untuk memberi kemudahan kepada lebih banyak firma menerima guna teknologi berkaitan Industri 4.0 bagi meningkatkan produktiviti. Sektor pembuatan juga akan memberi tumpuan untuk menerapkan teknologi

penting seperti IoT, AI, *sensor fusion* serta *deep and machine learning* dalam proses pembuatan produk selaras dengan pelaksanaan Industry4WRD.

6. RMKe-12 juga akan memberi tumpuan untuk melonjakkan pertumbuhan beberapa industri strategik dan berimpak tinggi dengan memanfaatkan teknologi termaju dan pendigitalan selaras dengan Dasar Revolusi Perindustrian Keempat (4IR) Negara dan Rangka Tindakan (*Blueprint*) Ekonomi Digital Malaysia. Industri ini adalah E&E, perkhidmatan global, aeroangkasa, kreatif, pelancongan, halal, pertanian pintar dan biojisim. Ianya adalah industri dan aktiviti strategik yang akan dimajukan lagi untuk menghasilkan produk dan aktiviti yang mempunyai nilai ditambah yang tinggi.

7. Industri ini diberi keutamaan berdasarkan kemampuan untuk memanfaatkan teknologi termaju dan keupayaan khusus, serta kesan pengganda yang tinggi. Pelaksanaan strategi di bawah RMKe-12 dijangka meningkatkan sumbangan industri tersebut kepada Keluaran Dalam Negeri Kasar (KDNK), mewujudkan peluang pekerjaan berpendapatan tinggi dan melonjakkan pendapatan eksport.

8. Kejayaan pelaksanaan semua langkah yang dinyatakan ini akan mengukuhkan daya saing dan daya tahan ekonomi serta menjadikan Malaysia sebagai pemain penting dalam rantai bekalan global untuk produk dan perkhidmatan yang kompleks dan mempunyai nilai ditambah yang tinggi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI SALAHUDDIN BIN
AYUB (PULAI)**

TARIKH : 25 OKTOBER 2021 (ISNIN)

SOALAN

DATUK SERI HAJI SALAHUDDIN BIN AYUB [PULAI] minta **PERDANA MENTERI** menyatakan apakah Kerajaan bersedia untuk memperkasakan institusi Parlimen dengan mewujudkan kumpulan penyelidik ala *Congressional Research Service*.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, pada masa sekarang perkhidmatan penyelidikan yang disediakan oleh Parlimen melalui Bahagian Penyelidikan dan Perpustakaan juga telah menerapkan prinsip seperti *Congressional Research Service* iaitu menyediakan penyelidikan dan analisis perundangan mengikut permohonan Ahli Parlimen.

Bahagian Penyelidikan dan Perpustakaan Parlimen juga turut melakukan analisis-analisis perundangan terhadap perkara-perkara terpilih dalam usaha mewujudkan '*Bank Data*' untuk kegunaan ahli-ahli Yang Berhormat dari semasa ke semasa. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

**DARIPADA : YB TUAN AHMAD FAHMI BIN MOHAMED
FADZIL [LEMBAH PANTAI]**

TARIKH : 25 OKTOBER 2021 (ISNIN)

SOALAN

Minta **MENTERI SAINS, TEKNOLOGI DAN INOVASI** menyatakan apa yang sebenarnya berlaku sehingga laman web pendaftaran Program Imunisasi COVID-19 Kebangsaan (PICK) bagi vaksin AstraZeneca telah gagal berfungsi pada 26 Mei 2021, berapa kos yang dibelanjakan untuk membina laman web tersebut, serta syarikat yang telah diberi kontrak tersebut.

JAWAPAN

Tuan Yang di-Pertua,

Terima kasih kepada Ahli Yang Berhormat Lembah Pantai terhadap soalan ini.

Untuk makluman Yang Berhormat,

Bagi memastikan Program Imunisasi COVID-19 Kebangsaan (PICK) berjalan lancar, Kerajaan menerusi MOSTI telah membangunkan laman sesawang Jawatankuasa Khas Jaminan Akses Bekalan Vaksin (JKJAV).

Laman sesawang ini menyediakan maklumat berkenaan status pelaksanaan PICK termasuk paparan data terkini pencapaian dan jumlah pendaftaran vaksinasi yang mana dikendalikan oleh Pasukan Petugas

Khas Imunisasi COVID-19 Kebangsaan atau singkatannya CITF. Kaedah pelaporan yang ditunjukkan kepada umum adalah bersifat **“real time data”**. Perkara ini menunjukkan ketelusan Kerajaan untuk berkongsi data mengenai perkembangan semasa status pelaksanaan PICK dalam negara.

Berbalik kepada pertanyaan Yang Berhormat, diketahui umum pada tarikh yang dinyatakan telah berlaku gangguan teknikal yang menyebabkan pengguna menghadapi kesukaran untuk menyelesaikan proses tempahan melalui laman sesawang tersebut.

Berikut adalah perincian mengenai situasi yang berlaku:

- pada jam 12 tengahari 26 Mei 2021, terdapat 3.6 juta pengguna direkodkan melayari laman sesawang tersebut.
- Sebanyak 1,261,000 dos vaksin AstraZeneca telah ditawarkan di mana tempahan slot telah habis dalam tempoh masa kurang satu jam.
- Sewaktu tempahan dibuka pada jam 12.20 pm, pada hari yang sama, berlaku gangguan teknikal iaitu masalah pada konfigurasi sistem. Hal ini telah menyebabkan pengguna menghadapi kesukaran untuk mengakses beberapa butang ciri pada laman tersebut.
- Laman sesawang tersebut tidak mengalami kegagalan atau “*crash*”, sebaliknya, sistem pendaftaran telah secara berterusan memproses purata 3,000 – 7,000 tempahan pada setiap saat.
- Ini menjelaskan mengapa ramai yang mengalami kesusahan untuk mendapat janji temu bagi tempahan vaksin AstraZeneca pada waktu itu.

Masalah ini telah diambil tindakan proaktif oleh pengendali laman sesawang tersebut. Mana-mana individu yang pendaftaran mereka tidak lengkap pada masa tersebut, telah dihubungi oleh urusetia CITF bagi memastikan pendaftaran mereka lengkap iaitu mendapat jadual janji temu untuk mendapatkan vaksin AstraZeneca.

Berkaitan dengan sistem pendaftaran secara atas talian bagi vaksin AstraZeneca, ianya telah dibangunkan **tanpa kos**. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN HAJI MOHAMAD BIN SABU
[JOHOR BAHRU]**

TARIKH : 25 OKTOBER 2021 (ISNIN)

SOALAN

TUAN HAJI MOHAMAD BIN SABU [KOTA RAJA] minta **PERDANA MENTERI** menyatakan sejauh manakah siasatan telah dilakukan terhadap Datuk Hasanah Ab Hamid, Bekas Pengarah Organisasi Perisikan Luar Malaysia (MEO) yang didakwa menerima bayaran sebanyak USD 12 juta dari ejen asing melalui negara barat menjelang PRU-14.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, siasatan terhadap Datuk Hasanah telah selesai dan telah pun didakwa di Mahkamah Sesyen Kuala Lumpur pada 25.10.2018 atas pecah amanah jenayah di bawah S.409 Kanun Keseksaan. Pada 12.4.2021 atas permohonan Peguam Negara, mahkamah melepaskan tanpa membebaskan (DNAA) kes ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEEMPAT
PARLIMEN KEEMPAT BELAS**

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 25 OKTOBER 2021 (ISNIN)

SOALAN

Minta **PERDANA MENTERI** menyatakan berapa buah sekolah Tahfiz yang telah diarahkan tutup oleh Kementerian sejak 2020. Apakah sebab-sebab arahan tutup dikeluarkan kepada sekolah-sekolah tersebut.

JAWAPAN

**YB SENATOR TUAN HAJI IDRIS BIN HAJI AHMAD,
MENTERI DI JABATAN PERDANA MENTERI (HAL EHWAL AGAMA)**

Tuan Yang di-Pertua,

1. Pandemik Covid-19 yang melanda dunia hari ini telah memberi impak yang besar kepada semua sektor termasuk sektor pendidikan. Justeru, Kerajaan telah memperkenalkan pelbagai inisiatif bagi membantu kelangsungan pengoperasian institusi pendidikan di negara ini termasuk institusi tahfiz swasta yang berdaftar dengan Pihak Berkuasa Agama Negeri. Antaranya dengan memperkenalkan Pengajaran dan Pembelajaran di Rumah (PdPR) bagi membolehkan institusi berkenaan terus dapat beroperasi dalam norma baharu. Suka saya jelaskan di dewan yang mulia ini bahawa berdasarkan maklumat yang disahkan oleh Pihak Berkuasa Agama Negeri, hakikatnya penutupan institusi tahfiz swasta berdaftar adalah hanya bersifat sementara, seperti sekolah aliran perdana, bagi mematuhi arahan Kerajaan supaya rantai jangkitan wabak Covid-19 dapat diputuskan. Sekian, terima kasih.